

四庫全書

史部

欽定四庫全書

欽定續通志卷二百二

列傳

唐二

蕭銑

杜伏威

閩稜王
雄誕

輔公祐

張善女

沈法興

李子通

朱粲

林士弘

梁師都

劉季真

李子和

羅藝

蕭銑後梁宣帝曾孫也祖巖梁安平王開皇初降陳
亡文帝誅之銑少貧傭書事母孝煬帝以外戚擢為羅
川令大業十三年岳州校尉董景珍雷世猛旅帥鄭文
秀許玄徹萬瓚徐德基郭華汙人張繡等謀反隋且推
景珍為王景珍曰吾素微雖假名號衆不厭羅川令故
梁裔也寬仁大度有武皇遺風且吾聞帝王之興必有
符命隋冠帶悉號起梁蕭氏中興象也乃遣人告銑
即募兵數千揚言跡盜將以應景珍會潁州賊沈柳生

寇縣銑出戰不利謂其下曰岳陽豪傑將推我為主今天下叛隋吾能守節獨完哉且吾先人國於此若徇其請復梁祚因以半紙檄召羣盜誰敢不從衆悅乃以十月稱梁公旂幟服色悉用其舊柳生即以衆歸銑用為車騎大將軍不五日遠近爭附衆數萬乃趨巴陵景珍遣徐德基郭華率彊姓數百迎謁未及見銑柳生與其下謀曰梁公起我最先附功第一今岳陽兵衆而位多誰肯為我下不如殺德基質其人獨挾梁公以進因殺

德基詣中軍白銑銑驚曰今欲撥亂遽自相屠我不能
為若主矣步出軍門柳生懼伏地請罪銑宥之陳兵而
進景珍曰德基倡義竭誠柳生擅殺之不誅無以為政
銑因殺柳生於是築壇城南祭上帝自稱梁王有異鳥
至建元為鳳鳴通鑑作鳴鳳義寧二年僭稱皇帝署百官一

用梁故事追諡從父琮為孝靖帝祖巖河間忠烈王父
璿文憲王封景珍晉王雷世猛秦王鄭文秀楚王許玄
徹燕王萬瓚魯王張繡齊王楊道生宋王隋將張鎮州

通鑑作
鎮周

王仁壽擊銑不能克聞煬帝弒乃與甯長真等

率領南州縣降於銑銑遣將蘇胡兒拔豫章使楊道生

取南郡張繡略定嶺表西至三峽南交趾北距漢水皆

附屬勝兵四十萬徙都江陵復園廟

按銑僭號徙都本
是一時事新史先

書義寧二年僭稱帝後書武德元年徙都江陵誤分爲
二雖武德改元卽是我寧之二年然兩號前後重出易
於疑誤學者
今爲刪正武德二年遣道生攻峽州刺史許紹擊破

之士死過半

新史擊之武德
元年今從通鑑

三年高祖詔夔州總管趙

郡王孝恭討之拔通開二州斬偽東平王閼提時諸將

擅兵橫恣銑恐寢不制乃陽議休兵營農以黜其權董
景珍之弟謀作亂事泄被誅景珍方鎮長沙銑下書赦
之召還江陵景珍懼遣使詣孝恭降銑遣張繡攻之景
珍曰前年醢彭越往年殺韓信獨不見乎奈何相攻繡
不答圍之景珍潰而走麾下殺之銑進繡為尚書令繡
恃功驕蹇銑又誅之於是大臣舊將皆疑間多叛去銑
不能禁四年詔孝恭與李靖率巴蜀兵順流下廬江王
瑗繇襄陽道黔州刺史田世康出辰州道黃州總管周

法明趨夏口會兵圖銳

新史稱法明為偽將按通鑑法明以前真定令襲據黃梅等四

郡五月來降授黃州總管非銳將也今從舊書

銳乃遣將文士弘拒孝恭戰清

江口孝恭大破之獲關艦千艘拔宜昌當陽枝江松滋

偽江州將蓋彥舉以城降孝恭靖直逼其都初銳放兵

止留宿衛數千人及倉卒追集江嶺回遠未及赴孝恭

布長圍守之數日破其水城取樓船數千銳度救不至

謂其下曰天不祚梁乎待窮而下必害百姓今城未拔

先出降可免亂諸人何患無君乃麾而令守陴者皆慟

以太牢告於廟率官屬總衰布幘詣軍門謝曰當死者
銑爾百姓非罪也請無殺掠孝恭受之護送京師後數
日救兵至且十餘萬知銑降乃送款銑至高祖讓之對
曰隋失其鹿英雄競逐銑無天命故為陛下禽猶田橫
南面豈負漢哉詔斬都市

謹按通鑑輯覽

御批唐於割據諸雄擒則無救若薛仁果竇建德輩其人固
非能終為人下者即銑之出降情哀詞迫而逃難迷都市
之戮蓋以絕人望而靖亂源勢固不得不爾所謂謀大事
者不顧小信即世充雖一時蒙貸而終為獨孤修德所戕
又安知非明以稽誅全秦王許以自僭國至滅凡五年
不死之言而陰授其指於修德歟

杜伏威齊州章邱人少豪蕩不治生貲與里人輔公柘約刎頸交公柘數盜姑家牧羊以餽伏威縣迹捕急乃相與亡命為盜時年十六狡譎多算嘗營護諸盜出為導入為殿其黨咸服之隋大業九年入長白山依賊左君行不得意舍去轉剽淮南稱將軍下邳賊苗海潮擁衆鈔暴伏威遣公柘脅諭曰天下共苦隋豪傑相與興義然力弱勢分不相統若合以為彊則無事隋矣公能為主吾且從不然一戰以決海潮懼即以衆下之江都

留守遣校尉宋顥將兵捕擊伏威與戰偽北誘顥墮葭
榛澤中順風縱火迫之步騎燒死幾盡海陵賊趙破陣
聞伏威兵少輕之召使并力伏威令公祐嚴兵居外自
引親將十人操牛酒入謁破陣置酒召酋首高會伏威
突斬破陣衆眙駭不及救公祐兵亦至遂并其衆至數
萬攻安宜屠之伏威養壯士三千餘人為假子分領軍
馬而閩稜王雄誕尤知名稜年長於雄誕軍中號稜大
將軍雄誕小將軍李子通始與伏威合後憚其才襲之

伏威被創墮馬雄誕負逃葭澤中得免隋遣虎牙郎將
來整討之伏威大敗身重創別將西門君儀妻王勇決
而力負伏威走雄誕率麾下將士十餘人從之追兵至
雄誕還拒數被創氣彌厲伏威遂脫收卒得八千與虎
牙郎將公孫上哲戰鹽城覆其軍場帝遣右禦衛將軍
陳稜以精兵討之稜不敢戰伏威遺以婦人服書稱陳
姥稜怒果悉兵至伏威迎出挑戰稜軍射中其額伏威
怒曰不殺汝矢不拔遂入稜陣大呼衝擊衆披靡獲所

射將使拔箭已斬之攜其首入稜軍示之又殺數十人
遂大潰稜走而免進破高郵引兵度淮攻厯陽據之自
稱總管分兵徇屬縣皆下伏威選敢死士五千號上募
寵厚之與均甘苦每攻取必先登戰罷閱創在背者殺
之所虜獲必分與麾下士有戰死以其妻殉故人皆有
奮宇文化及以為厯陽太守不受徙丹陽自稱大行臺
始進用士人繕利兵械薄賦歛除殉葬法民姦若盜及
吏受賕雖輕皆殺無赦上表越王侗侗以為東南道大

總管封楚王是時秦王方討王世充遣使招懷伏威乃獻款高祖授以東南道行臺尚書令江淮安撫大使上柱國吳王賜姓預屬籍以其子德俊為山陽公伏威遣其將陳正道徐紹宗以兵會取世充之梁郡又遣王雄誕討李子通禽之破汪華於歙州盡有江東淮南之地秦王已平劉黑闥師次曹充伏威懼乃入朝以公柝居守詔拜太子太保兼行臺尚書令留京師位在齊王元吉上以寵之伏威好神仙長年術餌雲母被毒武德七

年二月暴卒公祐反矯伏威令以紿衆趙郡王孝恭既平公祐得反書以聞高祖追其官削屬籍沒入家產貞觀元年太宗知其寃詔復官爵以公禮葬乃還其子封闕稜者伏威邑人善用兩刃刀其長丈名曰拍刀一揮殺數人前無堅對伏威署為左將軍部兵皆羣盜橫相侵牟稜案罪殺之雖親故無脫者從伏威入朝拜左領軍將軍越州都督公祐反稜與南討青山之戰與陳正通過陣方接稜脫兜鍪謂衆曰不識我邪何敢戰其徒

多稜舊部氣遂索至有拜者稜功多頗自伐公祐既禽
誣稜與已通謀又伏威王雄誕及稜資產在丹陽者當
原而趙郡王孝恭悉籍入之稜自訴忤孝恭遂以謀反
誅

王雄誕者曹州濟陰人伏威署為驃騎將軍伏威令輔
公祐擊李子通以雄誕稜為副戰溧水子通敗公祐乘
勝追之反為所擠士皆走壁雄誕曰子通徃於勝無營
壘今急擊之必克公祐不從雄誕獨提私卒數百銜枚

夜往乘風火之子通大敗走度太湖武德四年與子通戰蘇州却之子通以精兵保獨松嶺雄誕遣將陳當率千兵出不意乘高張疑幟夜縛炬於樹徧山澤子通懼燒營遁保餘杭雄誕追禽之歟守汪華在郡稱王且十年雄誕還師攻之華以勁甲出新安洞拒戰雄誕伏兵山谷以弱卒數千鬪輒走壁華來攻壁中奮殊死不可下會暮還雄誕伏兵已據洞口不得歸遽面縛降蘇賊聞人遂安據崑山無所屬伏威使討之雄誕以邑險而

完攻之引日遂單騎造壘門開曉禍福遂安即降以前
後功授歙州總管封宜春郡公伏威入朝以兵屬雄誕
輔公柘反雄誕不從遂縊殺之雄誕愛人善撫士每破
城邑無絲毫犯死之日江南士庶為流涕高祖嘉其節以
子世果襲封太宗立贈左驍衛大將軍越州都督諡曰
忠世果垂拱初至廣州都督安西大都護

輔公柘齊州臨濟人隋季與杜伏威為盜轉掠淮南伏
威自號總管以公柘為長史李子通據江都公柘以精

卒數千渡江擊之子通拒戰衆十倍銳甚公祐選甲士千人操長刀居前別以千人隨之令曰卻者斬公祐以衆殿俄而子通方陣而進長刀千人皆決死鬪公祐縱左右翼搏之子通大潰降其衆數千伏威既遣使歸國武德二年詔授公祐淮南道行臺尚書左僕射封舒國公伏威與公祐少相愛又凡事之故軍中呼輔伯尊禮畧等伏威稍忌之乃署養子闡稜為左將軍王雄誕為右將軍推公祐僕射陰解其兵公祐內怏怏不平乃與

故人左游仙偽學辟穀以自晦六年伏威入朝留公祐
居守復令雄誕握兵副之陰誡曰吾至京若不失職無
令公祐為變既行左游仙說公祐反公祐乃詐稱得伏
威書責雄誕貳雄誕信之稱疾不視事公祐因奪其兵
使其黨西門君儀諭以反計雄誕始悔悟曰天下方靖
吳王在京師當謹守藩奈何為族夷事雄誕雖死義不
從公祐知不可屈縊殺之乃紿言伏威移書令舉事八
月遂僭位國稱宋建元天明即陳故宮都之以左游仙

為兵部尚書東南道大使越州總管增修器械轉廩食
遣將徐紹宗侵海州陳正通寇壽陽詔趙郡王孝恭趨
九江嶺南大使李靖下宣城懷州總管黃君漢出譙齊
州總管李世勣由淮泗討之孝恭取蕪湖下梁山三鎮
公祐遣將拒戰孝恭等擊破之

詳見李靖傳

乘勝遂北至丹

陽公祐懼棄城將奔左游仙於會稽兵尚數萬至毗陵
能從者裁五百其將吳騷孫安謀執之公祐棄妻子與
腹心士數十走武康野人執送丹陽孝恭斬之傳首京

師始公祐佐伏威據江東距公祐死凡十三年

張善安兖州方與人年十七亡命為盜轉掠淮南會孟讓敗得其散卒八百襲破廬江郡依林士弘不見信憾之反襲士弘焚其郛去保南康蕭銑取豫章遣將蘇胡兒守之善安奪其地據以歸國授洪州總管武德六年反輔公祏以為西南道大行臺善安掠孫州

唐書地理志武德五

年以南昌縣置孫州執總管王戎襲殺黃州總管周法明會安撫

使李大亮兵至諭以禍福答曰善安初不反為部下誑

誤降今易耳恐不免奈何大亮曰總管定降吾固不疑
因獨入其陣與善安握手語善安大喜將數十騎詣大
亮營大亮引入命壯士執之騎皆驚引去悉兵來戰大
亮使人諭之曰吾不留總管總管赤心歸國謂我曰若
還營恐為將士所制故自留不去耳

新書叙大亮語
太畧今從通鑑

黨罵曰總管賣我遂潰送善安京師自稱不與公柘謀
高祖赦之公柘破得其書遂伏誅

沈法興湖州武康人父恪陳廣州刺史法興隋大業末

為吳興郡守東陽賊樓世幹畧其郡煬帝詔與太僕丞
元祐討之義寧二年江都亂法興自以世南土屬姓數
千家遠近嚮服乃與祐將孫士漢陳果仁

通鑑作陳果仁

執祐

以誅宇文化及為名三月發東陽行收兵趨江都下餘
杭比至烏程衆六萬毗陵通守路道德拒之法興約連
和因襲殺之據其城遂定江表十餘州自署江南道總
管聞越王侗立乃上書稱大司馬錄尚書事天門公承
制置百官以陳果仁為司徒孫士漢司空蔣元超尚書

左僕射殷羊左丞徐令言右丞劉子翼選部侍郎李百藥為掾武德二年自稱梁王建元延康易隋官儀頗用

陳氏故事然專事威戮下有細故即誅之繇是將士攜

解俄遣子綸

新書作倫誤

救陳稜擊李子通反為所敗子通

乘鋒渡江破京口法興使將蔣元超戰虔亭大敗死之

法興懼棄城奔吳郡賊帥聞人遂安

新書作副安

遣將葉孝

辯迎之法興中悔將殺孝辯趨會稽為所覺懼自沉於

江起義寧至武德凡三年滅

李子通沂州丞人少貧以漁獵為生有餘則以賙人喜
執仇隋大業末長白山賊左才相自號博山公子通依
之羣盜皆暴忍獨子通仁愛歸者遂多不半歲有徒萬
人才相畏忌子通乃引衆度淮與杜伏威合為隋將來
整所破奔海陵得衆二萬自稱將軍大業十一年僭號
楚王字文化及之弒煬帝也以右禦衛將軍陳稜為江
都太守已而稜降高祖授以總管子通攻稜稜窮乞師
於沈法興杜伏威伏威自將屯清流法興遣子綸屯楊

子間數十里子通納言毛文深請募吳人詐為法興兵
夜襲伏威二人遂交惡無敢先戰者子通得悉力攻江
都克之稜奔而免子通僭即皇帝位國號吳建元明政
丹陽賊帥樂伯通以衆萬餘降之子通又敗法興兵遂
取晉陵以法興所署掾李百藥為內史侍郎典文檄尚
書左丞殷芊為太常卿司禮樂繇是江南士人多歸之
會伏威命輔公柘拔丹陽進屯溧水子通戰敗糧且盡
棄江都保京口伏威盡得其地俄東走太湖裒散兵二

萬人復張襲法興吳郡破之徙都餘杭東舉會稽南距
嶺西抵宣城北太湖悉有之武德四年伏威遣將王雄
誕討子通戰蘇州敗績退保餘杭雄誕進傳城子通窮
乃降伏威受之并樂伯通送京師高祖釋之賜宅一區
田五頃及伏威來朝子通語伯通曰伏威既來江東未
定我故兵多在江外若收之可建大功遂皆亡及藍田
為關吏所獲並伏誅

朱榮亳州城父人初為縣吏大業中從軍伐賊長白山

亡命去為盜號可達寒賊自稱迎樓羅王衆十萬度淮
屠竟陵沔陽轉剽山南所至殘戮無遺噍僭號楚帝建
元昌達攻拔南陽義寧末與山南撫尉使馬元規戰大
敗收餘衆復振至二十萬梁所克州縣皆發藏粟以食
去輒燔廬聚毀城郭專以剗為資於是人大餒死者係
路其軍亦匱乃掠小兒蒸食之戒其徒曰味之珍寧有
加人者第使他國有人我卹無儲哉隋著作佐郎陸從
典通事舍人顏慤楚謫南陽梁初引為賓客後盡食兩

家顯州首領楊士林田瓚起兵攻粲旁郡響赴戰淮源
粲大敗挈殘士奔荊潭遣使乞降高祖以為楚王遣散
騎常侍段確勞之確醉戲粲曰聞君噉人人作何味粲
曰噉醉人正似糟豚確罵曰狂賊歸朝乃一奴耳復得
噉人乎粲懼收確於坐并從者數十悉饗之以饗左右
遂屠荊潭奔王世充署龍驤大將軍東都平新洛水上
士庶擲瓦礫擊其尸須臾若冢

按新舊二史並以朱粲
林士弘張善安三人附

李子通傳末考粲士弘皆自立名號與子通不相下不
當在附書之例善安與輔公祐通謀今改列輔公祐傳

後

林士弘饒州鄱陽人隋季與鄉人操師乞起為盜師乞

自號元興王建元天成

按隋書煬帝紀大業十二年鄱陽賊操天成舉兵反自號元興

王建元始興攻陷豫章郡今從新唐書

據豫章以士弘為大將軍隋遣治

書侍御史劉子翊討賊射殺師乞士弘收其眾復戰彭

蠡子翊敗死之

按隋書誠節傳子翊由治書侍御史為丹陽留守尋遣於上江督運為賊吳棻

子所虜聞煬帝被弑賊欲請以為主不從賊執子翊至臨川城下使告城中曰帝已崩子翊反其言於是見害此云與士弘戰死事迹迥異遂大振眾十餘萬據虔州年月先後亦不合未知孰是

自號南越王俄僭號楚稱皇帝建元太平

按唐高祖實錄士弘僭號

建元延康今據新唐書及隋書

臨川廬陵南康宜春豪傑皆殺隋守令

以附北盡九江南番禺悉有之後蕭銑以舟師破豫章

士弘獨有南昌

南昌即建昌

虔循潮之地銑敗其亡卒稍歸

之復振趙郡王孝恭招慰降循潮二州武德五年士弘

弟藥師以兵二萬圍循州總管楊世畧破斬之士弘懼

請降其將王戎亦獻南昌地士弘復遁保安城山洞袁

人相響應之為張善安所察以兵赴討會士弘死其眾

遂散

按舊書王戎以南昌降拜南昌州刺史戎召士弘藏之於宅招誘舊兵更謀作亂洪州總管張善安

密知其事發兵討之通鑑云士弘保安成山洞洪州總管若干則遣兵擊破之未知孰是今據新書

梁師都夏州朔方人仕隋鷹揚府郎將大業末罷歸結

徒殺郡丞唐世宗

舊書作唐宗避太宗諱

據郡稱大丞相聯兵突

厥與隋將張世隆戰敗之因畧定雕陰弘化延安僭皇

帝位國號梁建元永隆始畢可汗遣以狼頭纛號大度毗

伽可汗解事天子遂導突厥兵居河南地拔鹽州郡武

德二年寇靈州長史楊則擊走之又與突厥千騎營野

猪嶺延州總管段德操勒兵不戰伺師都氣懈遣兵進擊
戰酣德操自以輕騎出其旁乘之師都大潰未幾以步
騎五千入寇德操又盡屠其軍及劉武周敗師都將張
舉劉昊相繼降唐師都懼遣尚書陸季覽說處羅可汗
曰隋亡中國裂為四五勢均力弱皆爭附突厥今唐滅
劉武周兵方四出師都將朝夕亡然次亦及突厥願可
汗如魏道武新舊書皆作孝文接魏取中原在道武時今從通鑑引兵而南師都
請為鄉道處羅納之將出師而處羅死五年德操又悲

兵攻師都克其東城師都保西城不敢出求救於突厥
頡利頡利以勁兵萬騎赴之德操乃還

通鑑載此事在
武德五年新書

係之六
年恐誤

先是稽胡大帥劉仝成以衆赴師都因讒見殺

其下疑懼乃多叛師都日益威遂往朝頡利敕使南畧

故突厥盜邊無寧歲後頡利政亂太宗以師都勢危諭

之以書不從詔夏州長史劉昊司馬劉蘭

通鑑作
劉蘭成經畧

之多縱反間離其君臣數出輕騎蹂其稼城中饑虛其
將辛獠兒李正寶馮端謀執師都降不果正寶挺身歸

貞觀二年吳等表可取狀詔柴紹薛萬均并力令吳以
勁卒直據朔方東城頡利來援紹逆戰破之進屯城下
其從父弟洛仁斬師都降擢洛仁為右驍衛將軍朔方
郡公師都自起至滅十二年

劉季真離石胡人父龍兒隋末舉兵自稱王以季真為
太子第六兒為永安王將軍潘長文連年擊不能下後
虎賁即將梁德破殺龍兒衆乃散唐兵起季真與六兒
復聚衆附劉武周季真自號太子王

舊書季真北連突厥自稱突利可汗

六兒為拓定王送為邊害武德二年六兒遣使請降詔

以為嵐州總管

本傳失載六兒降事據通鑑增

明年西河公張綸真鄉

公李仲文合兵討李真亦降授石州總管賜姓李封彭

山郡王

舊書作彭城郡王

尋復從宋金剛金剛敗秦王執六兒

斬之季真棄石州奔高滿政俄被殺

季子和同州蒲城人本郭氏為隋左翊衛以罪徙榆林

大業末郡饑子和與死士十八人執郡丞王才數以不

恤下斬之開倉賑窮乏自號永樂王建元丑平號其父

為太公有騎二千南連梁師都北事突厥納弟為質始
畢可汗冊子和為平楊天子不敢當乃更署為屋利設
武德元年獻款授靈州總管金河郡公徙邠國公襲師
都寧朔城克之又伺突厥虛實陰以章聞為虜邏騎所
獲處羅可汗怒囚其弟子升於是子和危畏舉部南徙
詔內延州故城五年從平劉黑闥有功賜姓拜右武衛
將軍貞觀六年靜州山獠反子和奉詔擊敗之
從本紀增 十
一年為婺州刺史徙夷國公顯慶初轉黔州都督乞骸

骨許之進金紫光祿大夫卒

羅藝字子延襄州襄陽人家京兆之雲陽父榮隋監門將軍藝勇戰攻善用槊大業中補虎賁郎將遼東之役李景以武衛大將軍督饗北平詔藝以兵屬分部嚴一然任氣嘗侮慢景頻為景辱藝銜之時涿郡號富饒伐遼兵仗多在又臨朔宮多珍寶屯師數萬苦盜賊侵掠留守將趙什住賀蘭誼晉文衍等不能支藝捍寇數破卻之勇常冠軍為諸將忌畏藝陰自計因出師詭說衆

曰吾軍討賊數有功而食乏官粟若山而留守不賑恤
豈安人彊衆意耶士皆怨既還郡丞出郊謁藝執之陳
兵入什住等懼爭聽命藝即發庫貲賜戰士倉粟給窮
人境內大悅殺異已者渤海太守唐禕等威動北邊柳
城懷遠並歸附黜柳城太守楊林甫改郡曰營州以襄
平太守鄧暉為總管藝自稱幽州總管宇大化及遣使
招藝藝曰我隋舊臣義不辱賊斬使者為煬帝發喪三
日竇建德高開道亦遣使於藝藝謂官屬曰建德等皆

劇賊不足共功名唐公起兵據關中民望所繫王業必

成吾決歸之敢異議者戮會張道源撫輯山東亦諭藝

降武德二年乃奉表以地歸

按舊書藝降在三年通鑑據齊錄以為元年十二月

事未知孰是今從新書

詔封燕王賜姓預屬籍數與建德戰多所

禽馘秦王擊劉黑闥高祖詔藝弟監門將軍壽以兵從

藝自率衆數萬破劉什善張君立於徐河黑闥引突厥

入寇藝復以兵與皇太子建成會洺州遂請入朝帝厚

禮之拜左翊衛大將軍藝恃功驕倨秦王左右嘗至其

營藝折辱之高祖怒以屬吏久乃釋時突厥放橫藉藝
威名欲憚虜詔以本官領天節軍將鎮涇州太宗即位
進開府儀同三司藝內懼乃圖反詭言閱武兵既集稱
被密詔入朝軍至幽治中趙慈皓出謁遂據州帝命長
孫無忌尉遲敬德擊之未至慈皓與統軍楊岌謀誅藝
藝覺執慈皓岌居外覺變即勒兵攻之藝敗棄妻子將
奔突厥抵寧州左右斬之傳首梟於都市壽時為利州
都督亦及誅先是濟陰女子李

通鑑作曹州妖巫李
五戒五戒蓋其名自

言通鬼道能愈疾嘗往來藝家謂藝妻孟曰妃相貴當
母天下孟令視藝又曰妃之貴由於王貴色且發藝妻

信之亦贊以反既敗與李皆斬

按杜伏威李子和起於
羣盜自立名號後雖降

唐終非純臣之誼羅藝專制幽州歸朝未久卒以反誅
新史別為傳列於開國功臣之間於論世之義有所未
盡今從舊史與
輔公祏等合傳

欽定續通志卷二百二

欽定四庫全書

欽定續通志卷二百三

列傳

唐三

劉文靜

裴寂

劉弘基

殷開山

劉政會奇

唐儉憲

長孫順德

柴紹

趙文恪
李高遷

李思行
姜寶誼

許世緒
樊興

劉師立
公孫武達

劉義節
龐卿憚

錢九龍
張長遜

張平高

李安遠

馬三寶

李孟嘗

元仲文

秦行師

臣等謹按呂夏卿唐書直筆言新史修列傳之例
以年時為序次以事迹為聯合此例本不獨唐書
為然而求之新史亦不盡協今參用舊書畧為裁
定劉文靜裴寂倡建大計固為佐命之冠而劉弘
基以下六人附義起事名蹟尤著高祖所定為太
原首功者也故以類叙為一卷自餘武德諸臣稍
以文武功罪差次之定著為四卷貞觀以下並用

此例彙聚區分庶幾不失作者之初指云

劉文靜字肇仁京兆武功人父韶仕隋戰死贈上儀同
三司文靜以死難子襲儀同侑儻有器畧大業末為晉
陽令與晉陽宮監裴寂善寂夜見邏堞傳烽叱曰天下
方亂吾將安舍文靜笑曰如君言豪英所資也吾二人
相得何憂貧賤高祖為唐公鎮太原文靜察有大志深

自結既又見太宗

新書本傳稱太宗為秦王按是時太宗未受秦封高祖止稱唐公而子先

稱秦王于義未安今從舊書之例皆稱廟號

謂寂曰唐公子非常人豁達類

漢高神武同魏祖殆天啓之也寂未謂然文靜俄坐李
密嫺屬繫獄太宗私入視之文靜喜批言曰喪亂方劇
非湯武高光不能定太宗曰安知無其人哉今過此非
兒女子姁姁相憂者欲與君議大事也計將安出文靜
曰上南幸兵填河洛羣盜以萬數須真主取而用之誠
能應天順人奮襁大呼則四海不足定也今汾晉避盜
者皆在文靜素知其豪傑一朝號召十萬衆可得也尊
公所領兵復且數萬一下令誰不願從鼓而入關以震

天下王業成矣太宗笑曰君言正合我意乃陰部署賓客將發恐高祖不從文靜謀因裴寂開說於是介寂以交太宗遂得進議及突厥敗高祖雅兵高祖被劾太宗遣文靜寂共說曰公據嫌疑之地方以罪見收事急矣尚不為計乎晉陽兵精馬彊宮庫饒豐大事可舉也今關中空虛代王弱賢豪並興未有適歸願公引兵西誅暴除亂乃受單使囚乎高祖私可會得釋而止太宗教文靜偽為詔發太原西河雁門馬邑男子年二十至五

十悉為兵期歲盡集涿郡以伐遼繇是人心愁擾益思亂文靜謂寂曰先發制人後發制於人且公為宮監以宮人侍客公死何憾奈何累唐公寂懼乃勸起兵太宗委文靜長孫順德等募士聲討劉武周文靜與寂作符勅發宮監庫物佐軍興會副留守王威高君雅猜貳文靜與劉政會為急變書詣留守告二人反候高祖與威君雅視事文靜進曰有密牒言反者高祖目威等省牒政會不肯曰所告乃副留守唯唐公得觀高祖陽驚曰

詎有是乎讀已語威曰人告公等信乎君雅詒曰反人
欲殺我耳文靜叱左右執之由是舉兵開大將軍府以
文靜為司馬文靜勸改旗幟又請與突厥連和皆從之

遣文靜使始畢可汗請兵且與之約

通鑑考異曰文靜傳始畢問唐公起

事今欲何為文靜曰皇帝廢冢嫡傳位後主致斯禍亂
唐公國之懿戚起義軍欲黜不當立者按創業起居注
先已再遣使至突厥不容
始畢方有此問今不取曰若入京師金帶子女盡以

歸可汗始畢大喜即遣二千騎隨文靜至又獻馬千匹
高祖喜曰非君何以致之尋拒屈突通于潼關與其將

桑顯和苦聞死者數千文靜度顯和兵急以奇兵從其

後掩之顯和敗績

詳見屈突通傳

通兵尚數萬欲引而東文靜

命將追執之徇新安以西皆下轉大丞相府司馬進光

祿大夫魯國公高祖即位擢納言帝多引貴臣共榻坐

文靜諫曰今率土莫不臣而延見羣下言尚稱名帝坐

嚴尊屈與臣子均席此王導所謂太陽俯同萬物者也

帝曰我雖應天受命宿昔之好何可忘公其無嫌薛舉

寇涇州以元帥府長史與司馬殷開山出戰大敗奔還

京師坐除名與討仁果平之復爵邑授民部尚書陝東
道行臺左僕射文靜自以材能過裴寂遠甚又屢有戰
功而寂獨用故舊恩居其上意不平每論政多戾駁遂
有隙嘗與弟散騎常侍文起飲酣有怨言拔刀擊柱曰
當斬寂首會家數有怪文起憂召巫夜被髮銜刀為禳
厭文靜妾失愛告其兄上變遂下吏帝遣裴寂蕭瑀訊
狀對曰昔在大將軍府司馬與長史畧等今寂已僕射
居甲第寵賚不貲臣官賞等衆人誠不能無少望帝曰

文靜此言反明甚李綱蕭瑀明其不反秦王亦以文靜
首決非常計事成乃告寂今任遇弗等故怨望非敢反
宜賜全宥帝素疏忌之寂又言文靜多權詭而性猜險
今天下未靖留之恐為後憂帝遂殺之

通鑑考異曰高祖實錄唐書唐

歷等皆以文靜之死由于裴寂今據實錄此年六月裴寂為晉州道行軍總管討劉武周此月丁丑為宋金剛敗于介州去文靜死才七日此時不當在京師蓋年五寂未行時先有此言高祖未忍殺此時始決意耳

十二文起亦死籍其家文靜臨刑撫膺曰高鳥盡良弓
藏果不妄貞觀三年追復官爵以子樹義襲魯國公詔

尚主然怨父不得死謀反誅

裴寂字玄真

宰相世系表字真玄

蒲州桑泉人年十四補郡主簿

及長偉容貌涉知書傳隋開皇中調左親衛家貧徒步

走京師過華山祠祈神自卜夜夢老人謂曰君年踰四

十當貴

舊書夜夢白頭翁謂寂曰卿年三十以後方可得志終當位極人臣耳按寂以貞觀三年免官

未幾卒年六十以是推之寂佐高祖起事時年已四十七八矣今從新書大業中歷侍御史

晉陽宮副監高祖雅與厚及留守太原契分愈密至蒲

酒通晝夜太宗與劉文靜方建大計未敢白欲因寂闕

說乃出私錢數百萬餉龍山令高斌廉俾與寂博陽不勝寂得進多大喜日滋昵太宗以情告之許諾寂嘗以宮人侍高祖恐事發誅問飲酣乃白太宗將舉兵狀因言今盜徧天下城閤外即戰場雖徇小節猶不脫死若舉義師不特免禍且就大功高祖然所計兵起寂進宮女五百米九百萬斛雜綵五萬段鎧四十萬首大將軍府建為長史下臨汾封聞喜縣公至河東屈突通未下而三輔豪傑多歸者高祖欲先取京師恐通掎其後犹

豫未決寂說曰今通據蒲關未下而西我腹背支敵敗之符也不若破通而後趨京師太宗曰不然兵貴神速且關中羣盜處處屯結易以招懷撫而有之衆附兵強何向不克通自守賊耳庸能患我一失其機勝負未可計也高祖兩從之留兵圍蒲而遣太宗入關長安平賜寂田千頃甲第一區物四萬段遷大丞相府長史進魏國公邑三百戶隋帝禪位寂陳符命勸進又督太常具儀撰日高祖即位曰使我至此者公也拜尚書右僕射

詔尚食日給御膳視朝必引與同坐入閣則延卧內言無不從呼為裴監不名也武德二年劉武周寇太原寂請行授晉州道行軍總管以便宜決事賊將宋金剛據介州寂屯度索原賊埭水上流寂徙屯為賊所搏兵大潰死亡畧盡寂晝夜馳抵平陽鎮戍皆沒上書謝罪高祖慰諭俾留撫河東寂無他才惟飛檄郡縣促入屯壘相保贊焚積聚人益惴駭思亂夏人呂崇茂殺其令反為賊守寂攻之復為所敗召還帝責讓良久以屬吏俄

釋之遇待如初帝每巡幸必委以居守麟州刺史韋雲

起告寂反

吳縝糾謬曰按雲起傳雲起未嘗為麟州亦無告裴寂反之事又地理志麟州乃開元十

二年始置則方武德時固未有麟州也今按唐書地理志麟游縣武德元年曰麟州貞觀元年州廢是唐初固

有麟州矣吳氏糾之非是

按訊無狀帝謂曰朕有天下公推轂成之

也容有貳哉所以訊吏欲天下人信公不反耳詔貴妃

三人齋玉食寶器宴其家經宿去帝嘗從容夸語曰前

王多興細微間闕行陣而後成功我家隴西舊族世姍

姪帝室一呼倡義不三月有天下公復華胄職官光顯

非劉李亭長蕭曹刀筆吏比也我與公無媿焉四年改鑄錢賜一鑪得自鑄又聘其女為趙王元景妃遷左僕射帝置酒含章殿歡甚寂頊首請賜骸骨歸里帝泣下曰未也要當相與老爾公為宗臣我為太上皇逍遙晚歲不亦善乎九年冊拜司空遣尚書員外郎日一人直第貞觀初太宗親郊命寂與長孫無忌升金輅寂辭帝曰公有佐命勲無忌宣力王室非二人誰可參乘者遂同載歸三年浮屠法雅坐妖言誅辭連寂坐免官削封

邑半歸故郡寂請留京師帝讓曰公勲不稱位徒以恩
澤居第一武德之政間或弛紊職公為之今歸掃墳墓
尚可辭寂遂歸未幾汾陰狂男子謂寂奴曰公有天分
寂惶懼不敢聞遣監奴殺所言者奴盜寂封邑錢百萬
寂捕急遂上變帝怒曰寂有死罪四為三公與妖人游
一也既免官乃恚稱國家之興皆其所謀二也匿妖人
言不奏三也專殺以滅口四也我戮之非無辭議者多
請貸朕其從衆乎乃放靜州會山羌反或言劫寂為主帝

曰國家于寂有恩必不爾既而寂率家僮破賊帝念寂功詔入朝會卒年六十贈相州刺史工部尚書河東郡公子律師嗣尚臨海長公主終汴州刺史律師子承先宰相世系表作承光其官檢校左羽林將軍郕國公與本傳異武后時為殿中監為酷

吏所殺

劉弘基雍州池陽人少以蔭補隋右勳侍大業末從征遼賁之行及汾陰度後期且誅遂與其屬椎牛犯法諷吏捕繫歲餘以贖論因亡命盜馬自給至太原陰事高

祖又察太宗資度非常益自托由是蒙親禮兵將舉弘
基募士得二千人王威等鯁大事弘基與長孫順德伏
閤後麾左右執之從攻下西河宋老生敗棄馬投塹弘
基斬其首拜右光祿大夫師至蒲引兵先濟河下馮翊
為渭北道大使命殷開山副之西徇扶風衆至六萬南
度渭次長安故城振隊金光門隋將衛文昇來拒弘基
逆擊擒甲士千餘馬數百時諸軍尚未至弘基最先勝
高祖悅賜馬二十匹京師平功第一封河間郡公授右

驍衛大將軍討薛舉戰淺水原八總管軍皆沒

按吳縝糾謬謂

淺水原乃太宗戰勝之地曷嘗有八總管敗沒此弘基之沒亦高墪之戰耳因訖此傳為大誤今考薛舉傳云秦王壁高墪策賊可破遣將軍龐玉擊宗羅睺于淺水原戰酣王以勁兵擣其背是淺水原之與高墪地本相近太宗壁高墪而破賊于淺水原劉文静等觀兵高墪而八總管敗于淺水原兩事正相類非史家之誤也

唯弘基一軍戰力矢盡為賊拘帝以臨難不屈優護其

家仁果平乃克歸官之如初劉武周犯太原弘基屯平

陽復陷賊俄自拔歸授左一總管從秦王屯栢壁以勁

卒二千由隰州趨西河躡賊歸路賊銳甚弘基堅壁不

進及宋金剛遁走率騎尾之介休與王合擊大破之累

封任國公從擊劉黑闥還除并鉞將軍

舊書作秉鉞將軍

會突

厥患邊督步騎萬人備塞自幽北東拒子午嶺西抵臨

涇築障遮虜貞觀初李孝常等謀反坐與交除名為民

歲餘起為易州刺史復封爵召授衛尉卿改封夔國以

老乞骸為輔國大將軍朝朔望祿賜同職事太宗征遼

名為前軍大總管戰駐蹕山有功累加封戶至千一百

卒贈開府儀同三司并州都督陪葬昭陵謚曰襄遺令

給諸子奴婢各十五人田五頃謂所親曰使賢固不藉多財即不賢守此可以脫飢凍餘悉散之親黨子仁實襲封

殷開山名嶠以字行京兆鄠人涉書工為尺牘為隋太谷長高祖兵起召補大將軍掾從攻西河為渭北道元帥長史招慰關輔羣盜皆下與劉弘基破衛文昇兵賜爵陳郡公遷丞相府掾以吏部侍郎從秦王討薛舉會王疾甚卧營委軍于劉文靜誠曰賊方熾速戰利公

等母與爭糧盡衆枵乃可圖開山銳立事說文靜曰王

屬疾憂公弗克濟故不欲戰今宜因機制敵無專以賊

遺王也請勒兵以怖之遂戰高塠

新舊史作折塠折蓋析字之誤折塠乃仁

果所都此時唐兵未能至此今據通鑑作高塠

為舉所乘大敗下吏當死詔貸

之除名為民頃之從平仁果復爵位兼陝東道行臺兵

部尚書遷吏部從討王世充以功進爵鄖國公征劉黑

闥道疾卒王哭之慟詔贈陝東道大行臺右僕射謚曰

節貞觀十四年與淮安王神通河間王孝恭民部尚書

劉政會俱配饗高祖廟廷永徽中加贈司空

劉政會滑州胙人隋太原鷹揚府司馬以兵隸高祖麾

下高祖將舉兵遣政會為急變書告王威等反執威等

囚之

詳見劉文靜傳

大將軍府建為戶曹叅軍遷丞相府掾武

德初授衛尉少卿留守太原調輯戎政遠近懽服劉武

周寇并州政會為武周所擒每密表賊形勢既平復官

爵歷光祿卿封邢國公貞觀初轉洪州都督卒太宗手

詔政會昔預義舉有殊功葬宜異等於是贈民部尚書

謚曰襄後追徙渝國子元意襲爵尚南平公主高宗時
為汝州刺史

次子竒長壽中為天官侍郎荐張鷟司馬鯉為監察御
史二人因申屠瑒以謝竒正色曰舉賢本無私何見謝
後為酷吏陷被誅政會七世孫崇望崇龜崇魯自有傳

臣等謹按劉政會之七世孫崇望崇龜崇魯段志
玄之五世孫文昌六世孫成式舊史俱各為傳新
史改附于政會志玄傳攷史家附傳之例本以其

父子相承兄弟踵美恩澤由於勲舊時代未甚遠
隔故彙于一篇俾後世易于檢閱或其人事實無
多不能別為立傳雖世代稍遠亦可從附出之例
至如褚遂良為亮之子裴耀卿為守貞之子李德
裕為栖筠之孫功名顯于前人則各自為傳盧奕
為懷慎之子杞又為奕之子賢否迥殊則亦各自
為傳新舊書中如此類者不一而足此劉崇望段
文昌等並以文學自致通顯雖譜系有承實與崛

起無異且世代懸隔事迹亦絕不同新史附于政
會志立傳遂使一篇之中甫叙開弼之功忽及叔
季之事讀者既難尋其端緒且于本書義例未為
畫一今從舊史區而別之文昌與穆宗朝諸宰相
合傳而成式附見焉宗望與昭宗朝諸宰相合傳
而崇龜崇魯附見焉他傳有類此者亦皆析出以
年代事迹相比附而著其說于此

唐儉字茂約

新書作茂系今從
舊書及儉神道碑

并州晉陽人祖邕北齊

尚書左僕射父鑒隋戎州刺史與高祖善嘗偕典軍衛
故儉雅與太宗游同在太原儉見隋政寢亂陰說太宗
建大計高祖嘗召訪之儉曰公日角龍廷姓協圖讖若
外嘯豪傑北招戎狄右收燕趙濟河而南以據秦雍湯
武之業也高祖曰湯武之事豈可幾在私則圖存在公
則拯亂卿姑自重吾方思之及大將軍府開授記室叅
軍渭北道元帥司馬從定京師為相國府記室晉昌郡
公武德初進內史舍人遷中書侍郎散騎常侍呂崇茂

以夏縣反與劉武周連和詔永安王孝基獨孤懷恩于

筠率兵致討儉以使適至軍會孝基等為武周所虜儉

亦見擒始懷恩屯蒲州陰與部將元君實謀反

獨孤懷恩傳作

元君實會俱在賊中君實私語儉曰獨孤尚書將舉大事

猶豫不發故及此俄而懷恩脫歸復守蒲儉密遣劉世

讓

獨孤懷恩傳作劉讓避太宗諱

歸白發其謀

互見劉世讓獨孤懷恩傳

懷恩自殺

餘黨皆誅及武周敗儉封府庫籍兵甲以待秦王帝嘉儉身幽辱而不忘朝廷詔復舊官仍為并州道安撫大

使盡簿懷恩賞產賜儉還為禮部尚書天策府長史檢校黃門侍郎莒國公仍為遂州都督食綿州六百戶貞觀初使突厥還太宗謂儉曰卿觀頡利可取乎對曰銜國威靈庶有成功四年馳傳往誘使歸款頡利許之兵懈弛李靖因襲破之儉脫身還歲餘為民部尚書從獵洛陽苑羣豕突出於林帝射四發輒殪四豕一豕躍及鐙儉投馬搏之帝拔劍斷豕頌笑曰天策長史不見上將擊賊邪何懼之甚對曰陛下以神武定四方豈復逞

雄心于一獸帝為罷獵詔其子善識

按公主傳作義識神道碑作尚識未

詳孰是尚豫章公主儉居官不事事與賓客縱酒為樂坐

小法貶光祿大夫永徽初致仕加特進顯慶初卒年七

十八贈開府儀同三司并州都督陪葬昭陵謚曰襄少

子觀為河西令知名孫從心神龍中以子駿娶太平公

主女累擢殿中監駿太常少卿坐太平黨誅裔孫次扶

持彥謙見文苑傳

新書並附儉傳今從舊書

儉弟憲字茂彛仕隋為東宮左勳衛太子廢罷歸好馳

獵藏亡命交博徒輕俠高祖領太原頗親遇之參與大
議封安富縣公武德中累進雲麾將軍加郡公終金紫
光祿大夫

長孫順德文德皇后之族叔也仕隋為右勳衛征遼當
行亡命太原素為高祖親厚太宗將起兵令與劉弘基
募士于外旬月間至數萬人大將軍府建授統軍從平
霍邑臨汾絳郡有功與劉文静擊屈突通于潼關通將
奔洛陽順德跳追桃林執通以獻遂定陝縣功多進左

驍衛大將軍封薛國公與秦叔寶等討建成餘黨增食
邑賜宮女詔宿內省俄以受賕為有司劾發帝曰順德
元勲外戚爵隆位厚至矣若令觀古今自鑒有以益國
家者朕當與共府庫何至以貪冒聞乎因賜帛數十媿
切之大理少卿胡演曰順德以賂破法不可赦奈何又
賜之帝曰使有恥者得賜甚于戮如不能乃禽獸也殺
之何益李孝常謀反坐與交削籍為民歲餘帝聞功臣
圖見其像憐之召為澤州刺史復爵邑順德素少檢至

此折節為政以嚴明稱先時守長多通餉問順德繩撻
無所容前刺史張長貴趙士達占部中腴田數十頃奪
之以給貧單尋坐累還第未幾卒贈荊州都督謚曰襄

貞觀十三年封邳國公永徽中加贈開府儀同三司

按長

孫順德新唐書附長孫無忌傳後詳順德亦佐命功臣
名位足自表見不當從附出之例今從舊書列于唐儉
次之

柴紹字嗣昌晉州臨汾人幼趨悍有武力補隋太子千
牛備身高祖妻以平陽公主將起兵紹走間道迎謁時

太子建成齊王元吉亦自河東往遇諸塗建成曰追書
急恐吏逮捕請依劇賊冀自全紹曰不可賊知君唐公
子必執以為功徒死爾不如疾走太原既入雀鼠谷聞
已起兵乃相賀授右領軍大都督府長史領毅騎發晉
陽先抵霍邑城下覘形勢還白宋老生一夫敵我兵到
必出戰可虜也大帥至老生果出紹力戰有功從下臨
汾絳郡隋將桑顯和來戰紹引軍繚其背與史大奈合
攻之顯和敗遂平京師進右光祿大夫封臨汾郡公高

祖即位拜左翊衛大將軍累從征討以多進封霍國公
遷右驍衛大將軍吐谷渾党項寇邊敕紹討之虜據高
射紹軍矢下如雨士失色紹安坐遣人彈胡琵琶使二
女子舞虜疑之休射觀紹伺其懈以精騎從後掩擊虜
大潰斬首五百級貞觀二年平梁師都轉左衛大將軍
出為華州刺史加鎮軍大將軍徙譙國既病太宗親問
之卒贈荊州都督謚曰襄二子哲威令武招威為左屯
衛將軍襲封坐弟謀反免死流邵州起為交州都督卒

令武尚巴陵公主遷太僕少卿衛州刺史襄陽郡公與
房遺愛謀反貶嵐州刺史自殺始高祖論太原首功詔
尚書令秦王尚書左僕射裴寂納言劉文静恕二死左
驍衛大將軍長孫順德右驍衛大將軍劉弘基右屯衛
大將軍竇琮左翊衛大將軍柴紹內史侍郎唐儉吏部
侍郎殷開山鴻臚卿劉世龍衛尉少卿劉政會都水監
趙文恪庫部郎中武士護驃騎將軍張平高李思行李
高遷左屯衛長史許世緒等十四人恕一死武德九年

十月太宗定功臣封戶時文靜已死乃自寂而下差功
大小第之總四十三人寂戶千五百長孫無忌王君廓
尉遲敬德房玄齡杜如晦戶千三百長孫順德柴紹羅
藝趙郡王孝恭戶千二百侯君集張公謹劉師立戶千
李勣劉弘基戶九百高士廉宇文士及秦叔寶程知節
戶七百安興貴安修仁唐儉寶軌屈突通蕭瑀封德彝
劉義節戶六百錢九隴樊興公孫武達李孟嘗段志玄
龐卿憚張亮李靖杜淹元仲文戶四百張長遜張平高

李安遠李子和秦行師馬三寶戶三百趙文恪等十八

人功不甚顯今次第其名附出左方云

安修仁安興貴事在李執傳

趙文恪并州人為情薦揚府司馬高祖起兵

新舊史書高祖起兵

多云義兵或云義師鄭樵云隋書稱唐兵為義兵伐人之君可以為義乎此說最正今皆刊改後仿此

授

右三統軍武德二年擢都水監封新興郡公時中國經

大亂馬耗詔文恪至并州與齊王誘市邊馬以備軍劉

武周寇太原屬城盡沒李仲文守涪州兵力孤絕齊王

使文恪率步騎千餘助守會太原陷遂棄城遁詔下獄

死李思行趙州人避仇太原高祖將起兵使覘詔長安還具論机策稱旨授左三統軍從破霍邑平京師累擢嘉州刺史樂安郡公卒贈洪州都督謚曰襄

李高遷岐州岐山人客太原高祖引致左右執高君雅等有功以右三統軍從下霍邑圍長安力戰遷左武衛大將軍江夏郡公檢校西麟州刺史突厥寇馬邑高滿政請救詔高遷督兵助守賊盛乃夜斬關走所將皆沒坐除名徙邊後歷資州刺史

舊書作陵州刺史

卒贈涼州都督

舊書涼
作梁

姜寶誼秦州上邦人父遠仕周為秦州刺史朝邑縣公
寶誼為隋鷹揚郎將領府兵從高祖督盜太原及起兵
授左統軍下西河霍邑功多爵至永安縣公歷右武衛
大將軍劉武周使黃子英數盜崔鼠谷帝遣寶誼擊之
賊輕甲挑師戰接而三遁逐之伏發寶誼為賊執俄亡
歸興裴寂拒宋金剛戰汾州兵合寂弃軍走寶誼復為
所禽帝聞為泣下曰彼烈士必不下賊死矣賜其家物

千段米三百斛果謀還被害且死西向大呼曰臣魚狀
負陛下賊平詔迎其柩贈左衛大將軍幽州總管謚曰
剛子協字壽善篆籀歷燕然都護夏州都督封成紀縣
侯謚曰威

許世緒并州人

按許景先傳常州義興人曾祖緒武德時以佐命功歷左散騎常侍封真定公

遜家洛陽所云緒者即世緒也邇太宗諱故祇稱下一字但里居官稱互異未詳孰是 隋鷹揚府

司馬知隋將亡請高祖曰公姓名著謠錄今學五郡之
兵據四戰之衝苟無奇計禍不反踵若收取英俊為天

下倡帝王業也高祖奇之兵起授右一府司馬累除蔡州刺史真定郡公弟洛仁亦從起晉陽錄功至冠軍大將軍卒贈代州都督諡曰勇陪葬昭陵

劉師立宋州虞城人始事王世充為親將洛陽平當誅秦王壯其才釋不死引為左親衛與尉遲敬德龐卿惲李孟嘗等九人同誅建成錄功拜左衛率遷左驍衛將軍襄武郡公有告師立姓在符讖欲反者太宗謂曰人言卿將反果乎對曰臣為隋官不過六品今位將軍願

已極矣何敢反帝笑曰朕知妄耳賜東帛召入卧内慰
勉羅藝反京師震駭詔師立檢校右武侯大將軍勒兵
備非常藝平師立坐與藝善除名尋以藩邸舊檢校岐

州都督

党項傳作
岷州都督

上書請討吐谷渾未報即遣使開諭

部落多降附者列其地為開橋二州又党項酋拓拔赤

辭先附吐谷渾倚險自守亦遣說下之師立以母喪解

岐人表留遂不得赴哀時河西党項破丑氏

舊書作破
丑氏党項

傳亦
作丑

嘗苦邊又阻新附師立討之軍未至破丑懼遁去

師立窮追之抵邨于真山而還又戰吐谷渾于小莫門
川破之轉始州刺史卒諡曰肅

劉義節并州人隋大業末補晉陽鄉長富于財裴寂荐
之高祖又與王威高君雅游兵將起威君雅疑之義節
刺知其情得先事禽威等從平京師為鴻臚卿時傾府
庫為軍賞帑財大乏義節曰今京師屯兵多樵貴帛賤
若伐六街及苑中樹為薪以易布帛歲數十萬可致又
請軸杼藏內見繒取美尺補雜費得十餘萬段調度遂

給遷太府卿封葛國公義節本名世龍或言世龍子名鳳昌父子非人臣兆高祖不聽更賜今名貞觀初轉少府監坐貴入賈人珠及故出署丞罪廢為民徙嶺南終欽州別駕從子思禮武后時為箕州刺史少學相人于

張憬藏相已必歷刺史位至太師

新書謂憬藏相思禮今從舊唐書

及

授箕州益喜以為太師位尊非佐命不可得乃結洛州錄事叅軍慕容連耀謀反謂耀曰君體有龍氣耀亦曰公金刀當輔我思禮因以術眩衆見者必曰當三品俟其

意悅然後云綦連耀當受命公等皆因之事敗武懿宗
按之弛思禮禁使多逮引思禮與自脫悉引素相忤者
將刑猶不寤與衆人斬于市其知名者如李元素孫元
亨石抱忠王勵勳兄勔路敬淳等三十餘族竄逐千餘
人

錢九隴字永業湖州長城人

舊書晉陵人

父文强為吳明徹

裨將與明徹俱敗彭城入隋以罪沒為奴故九隴事高
祖善騎射常備左右兵起以功授金紫光祿大夫從戰

薛仁果劉武周累擢為右武衛將軍從平洛陽佐皇太子建成討劉黑闥魏州以功最封鄆國公以本官為苑游將軍貞觀初為眉州刺史改巢國卒贈左武衛大將軍潭州都督諡曰勇陪葬獻陵

樊興安州人以罪為奴從高祖平長安授左監門將軍

從秦王積戰多封營國公

李愬傳作榮國公

坐事削爵貞觀六

年陵州獠反命討之拜左驍衛將軍又從李靖擊吐谷渾為赤水道行軍總管後軍期士多死亡失器仗以勲

減死後為左監門大將軍襄城郡公太宗征遼以興忠
謹副房玄齡留守京師檢校右武侯將軍卒贈左武侯
大將軍洪州都督陪葬獻陵

公孫武達京兆櫟陽人以豪俠稱為隋驍果兵興武達
至長春宮上謁從秦王討劉武周功多累遷秦府右三
軍驃騎封清水縣公貞觀初為肅州刺史突厥騎數千
入寇謀南趨吐谷渾武達以精兵二千人與戰虜稍却
復殊死鬪薄之張掖河潛命上流度兵虜已半濟乃兩

岸夾擊斬溺畧盡璽書勞之遷左監門將軍鹽州突厥
叛詔武達趨靈州追反賊賊方度河乃據南涯陣武達
擊之斬其帥可邏拔扈進封東萊郡公

李愷傳作
沔陽縣公

終右

武衛大將軍贈荊州都督陪葬昭陵謚曰壯

龐卿憚并州太原人從討隱太子有功拜右驍衛將軍
邾國公卒追改濮國公子同善右金吾大將軍同善子
承宗開元初仕至太子賓客

張長遜京兆櫟陽人隋末為五原通守遭亂附突厥號

為割利特勒唐兵起以郡降即拜五原太守安化郡公
徙封范陽時梁師都薛舉請突厥兵南渡河長遜矯作
詔與莫賀咄設以伐其謀會唐使亦至突厥兵不出武
德元年詔右武侯驃騎將軍高世靜

舊唐作高靜
避太宗諱

聘始

畢可汗至豐州而始畢死詔留金幣不遣突厥怒引兵

南至河長遜遣世靜出塞勞之且若專致聘賜者突厥

引還授總管改楊國公

舊唐書進
封巴國公

及討薛舉不待命輒

引兵會賜錦袍金甲或譖長遜居豐久與突厥為脣齒

長遜懼請入朝授右武侯將軍徙息國公屬有疾高祖親問之後竇執率巴蜀兵擊王世充以長遜檢校益州行臺左僕射歷遂夔二州總管政以惠稱貞觀十一年卒

張平高

金石錄唐丹州刺史張崇碑云公諱崇字平高傳以字為名

綏州膚施人為

隋鷹揚府校尉戍太原遂預謀議從高祖平京城累授左領軍將軍封蕭國公貞觀初為丹州刺史坐事以右光祿大夫還第卒追封羅國贈潭州都督

李安遠夏州朔方人父徽隋雲州刺史安遠少無檢與
博徒游至破產晚乃折節嚮書襲父爵城陽公與王珪
善珪坐王頗得罪當流安遠為營護免後補正平令高
祖起兵攻絳州安遠與通守陳叔達嬰城拒高祖與安
遠有舊及拔絳撫慰其家引與同食授右翊衛統軍正
平縣公後從破屈突通進右武衛大將軍數從秦王征
討積功累封至廣德郡公

按石刻秦王告少林寺教作
德廣郡開國公新舊史俱作

廣德
疑誤

奉使吐谷渾與約和請為互市邊場利之隱太子

將亂欲引為援安遠介無貳志秦王益親重貞觀初嘗命統邏騎都下督盜賊歷潞州都督懷州刺史皆以幹用顯然急刻少恩由是損名卒贈涼州都督諡曰安

舊書

諡曰追封遂安郡公

密

馬三寶柴紹家僮也高祖起兵三寶奉平陽公主遁司

竹園說賊何潘仁與連和三寶自稱總管撫接羣盜兵

至數萬

互見公傳

高祖濟河授左光祿大夫秦王至竹林

宮三寶以兵詣軍門謁遂從平京師拜太子監門率別

擊叛胡劉拔真于北山破之從平薛仁果與柴紹擊吐

谷渾于岷州先降陷陣斬名王俘執數千以功封新興

縣男貞觀初拜左驍衛大將軍

李愬傳作右
領軍大將軍

進爵為公

卒諡曰忠

李孟嘗趙州平棘人終右威衛大將軍漢東郡公

李愬
傳作

濟東

郡公

元仲文洛州人終右監門將軍河南縣公

秦行師并州太原人終右監門將軍清水郡公

按趙文
恪以下

十八人舊附劉裴傳後
今以綴于本卷之末

欽定續通志卷二百三

欽定四庫全書

欽定續通志卷二百四

列傳

唐四

溫大雅

彥博

陳叔達

竇威

執孝

琮

抗

靜

誕

李綱

諶

璉

德明

德玄

鄭善果

元璿

裴矩

皇甫無逸

崔善為

高士廉

履行

溫大雅字彥宏

按大雅兄弟三人名大者字彥名彥者字大歐陽修集古錄嘗疑之洪适据大

雅所撰唐創業起居注書隋煬帝遣使夜至太原溫彥將宿於城西門樓上首先見之報兄彥宏馳啓帝帝方臥聞而驚起執彥宏手是溫氏昆弟皆以彥為名明矣其書首題大雅奉敕撰乃後人避孝敬皇帝諱追改之其說是矣又唐初人多以字行故并州祁人父君攸隋新舊史亦以大有為彥將名耳

泗州司馬見朝政不綱謝病歸大雅性至孝與弟彥博

大有皆知名薛道衡見之歎曰三人者皆卿相才也初為東宮學士長安尉以父喪解不復仕高祖鎮太原厚禮之兵興引為大將軍府記室參軍主文擢帝受禪與

竇威陳叔達討定儀典遷黃門侍郎而彥博亦為中書
侍郎對管華近帝嘗從容謂曰我起晉陽為卿一門耳
進工部侍郎陝東道大行臺尚書隱太子圖亂秦王表
大雅鎮洛陽湏變數陳祕畫多所嘉納太宗即位轉禮
部尚書封黎國公將改葬其祖占者曰弟則吉不利於
君大雅曰如子言我含笑入地矣歲餘卒諡曰孝永徽
五年贈尚書右僕射五世孫造自有傳

彥博字大臨開皇末對策高第授文林郎直內史省隋

亂幽州總管羅藝引為司馬藝以州降彥博與有謀授
總管府長史封西河郡公召入為中書舍人遷侍郎彥
博善辭令每問四方風俗臚布詔令若成誦然進止詳
華人皆拭目觀高祖嘗宴近臣遣秦王諭旨既而顧左
右曰何如溫彥博高麗貢方物高祖欲讓而不臣彥博
執不可曰遼東本周箕子國漢立菟郡不使北面則四
夷何所瞻仰帝納而止突厥入寇彥博以并州道行軍
長史戰大谷敗被執突厥知近臣數問唐兵多少及國

虛寔彥博不肯對囚陰山苦寒地太宗立突厥歸款得
還授雍州治中尋檢校吏部侍郎彥博欲汰擇士類寡
術不能壓衆訟牒滿廷時譏其煩碎復為中書侍郎遷
御史大夫檢校中書侍郎事貞觀四年遷中書令封虞
國公

新舊書本傳載議突厥
事詳四夷傳今不重出

十年遷尚書右僕射明年

卒年六十三彥博性周慎既掌機務謝賓客不通進見
必陳政事利害卒後帝歎曰彥博以憂國故耗思殫神
我見其不逮再棋矣恨不許少閑以究其壽家貧無正

寢殯別室帝命有司為構寢贈特進諡曰恭陪葬昭陵
子振挺振厯太子舍人居喪以毀卒挺尚千金公主官
延州刺史彦博曾孫曦尚涼國長公主裔孫庭筠見文
苑傳

彦將字大有

新舊書本傳俱云大有字
彦將今從宰相世系表

隋仁壽中李綱

薦授羽林騎尉高祖舉兵引為太原令從秦王徇西河
令參謀軍事西河下攝大將軍府記室與兄大雅同掌
機近不自安請徙他職帝曰我虛心待卿何所自疑武

德初累遷中書侍郎封清河郡公卒贈鴻臚卿諡曰敬
陳叔達字子聰陳宣帝子也少封義陽王厯丹陽尹都
官尚書隋大業中授內史舍人出為絳郡通守高祖西
師以郡聽命授丞相府主簿封漢東郡公與溫大雅同
筦機祕方禪代時書冊誥詔皆其筆也武德初授黃門
侍郎判納言封江國公叔達明辯善容止每占奏搢紳
屬目江左士客長安者多所薦拔嘗賜食得蒲萄不舉
帝問之對曰臣母病渴求不能致願歸奉之帝流涕曰

卿有母遺乎因賜之又賚物百段貞觀初與蕭瑀爭殿中坐忿諄不恭免官

事在武德九年太宗即位之後

未幾居母喪又有

疾太宗憂之遣使禁卻弔者喪除為遂州都督病不拜頃之擢禮部尚書始太子建成等閔間太宗帝感之叔達極意救辯至是謂曰武德內難卿有讜言故以此報叔達謝曰豈獨為陛下乃社稷計耳後幃薄汙慢為有司露劾帝以名臣為護掩授散秩歸第卒諡曰繆久之贈戶部尚書更諡曰忠

竇威字文蔚岐州平陸人隋太傅熾之子太穆皇后其

從兄弟女也

舊書作太穆皇后從父兄按隋書熾弟岳生毅即太穆后父也兄字衍

家世

勲貴喜武力而威獨尚文諸兄詆為書癡李德林舉秀

異射策甲科授祕書郎十餘歲不肯調官所學益博蜀

王秀辟為記室見秀行事不法謝病去秀廢府屬皆得

罪威獨免大業中累遷內史舍人數諫忤旨轉考功郎

中坐事免高祖入關召補大丞相府司錄叅軍時軍旅

草創典禮湮缺威多識朝廷故事乃裁定制度帝語裴

寂曰威令之叔孫通也武德元年拜內史令每論政事必引古為諭帝益親重之或引入卧內常為膝席後寢疾帝自臨問及卒家無餘財帝哭之慟贈同州刺史追封延安郡公諡曰靖有文集十卷子惲嗣官岐州刺史兄子軌從兄子抗並知名

軌字士則父恭周雍州牧鄼國公軌大業中為資陽郡東曹掾去官歸高祖起兵軌募衆千餘人謁長春宮帝大悅賜良馬十匹使掠地渭南下水豐倉收兵五千人

從平京師封贊皇縣公為大丞相諮議叅軍稽胡五萬
餘掠宜春詔軌討之次黃欽山遇賊乘高叢射師却軌
斬部將十四人拔其次代之令曰聞鼓不進者斬既鼓
士爭赴賊賊射不能遏遂大破之武德元年授太子詹
事赤排羌與薛舉叛將鍾俱仇寇漢中拜軌秦州總管
盡破降之封鄴國公三年遷益州道行臺左僕射許便
宜從事党項引吐谷渾寇松州詔軌與扶州刺史蔣善
合援之善合先至敗之鉗川軌復進軍臨洮擊左封走

其衆度羌必為患始屯田松州尋率所部從秦王討王世充於洛陽明年還蜀軌既貴益嚴酷然能自勤苦出師臨敵或旬月不解甲其下不用命即誅小過亦鞭笞流血由是蜀盜悉平初以其甥為腹心嘗夜出呼不時至即斬之又戒家奴毋出外忽遣奴取漿公厨既而悔之命斬奴奴呼冤監刑者疑不時決并斬之後入朝賜坐御榻容不肅又坐而對詔帝怒曰公入蜀時車騎驃騎從者二十人為公所誅略盡我隴種車騎未足給公

因繫詔獄俄釋還軌與行臺尚書韋雲起郭行方素不

協竟殺雲起

詳雲起傳

行方奔京師是歲行臺廢即授益州

大都督貞觀元年徵授右衛大將軍二年出為洛州都督洛陽因隋亂人不土著軌下令諸縣有游手末作者按之由是威信大行人皆務本卒贈并州都督子奉節尚永嘉公主厯左衛將軍秦州都督軌弟琮琮有武幹大業末犯法亡命太原依高祖與秦王有宿憾不自安王降禮接之與出入卧内意乃釋大將軍府建為統軍

從平西河破霍邑封扶風郡公尋從劉文静擊屈突通於潼關敗其將桑顯和通走以輕騎追獲之進兵下陝縣拔太原倉遷右領軍大將軍隋河陽都尉獨孤武歸

款

按李密傳作河陽都尉獨孤武都通鑑於其見殺又稱馬軍總管獨孤武都此處脫都字河陽都尉則舉

其前官也詔琮以兵迎之逗遛不進武見殺坐除名武德初

為右屯衛大將軍討王世充命守陝城世充將羅士信數鈔絕饒道琮使人說降之東都平檢校晉州總管從隱太子平劉黑闥以功封譙國公未幾卒贈左衛大將

軍諡曰敬永徽五年加贈特進

威從兄子抗字道生父榮定

舊書作榮新書舊刻作榮定與隋書本傳合

隋

洛州總管母文帝姊安成公主也

舊書作萬安公主

以帝甥早

貴入太學涉獵書史釋褐千牛備身儀同三司父疾五

旬不解帶居喪哀毀過禮襲爵陳國公轉梁州刺史母

卒數號絕帝遣宮人節哭歲餘起為岐州刺史轉幽州

總管所至以寬惠聞漢王諒反煬帝疑抗與通遣李子

雄馳代之子雄誣抗得諒書不奏按驗無狀然竟坐除

名初抗與高祖少親狎大業末煬帝遣抗出靈武巡護
長城聞高祖已定京師曰此真撥亂主也遂歸長安帝
喜握手引坐置酒為樂初揚元感反抗謂高祖曰元感
為我先耳李氏名在圖錄可乘其便帝曰為禍始不祥
公無妄言至是帝謂抗曰李氏竟能成事何如授將作
大匠兼納言尋罷為左武侯大將軍帝聽朝或引升御
坐既退入卧內談笑極平生歡或留宿禁中以兄呼之
宮中並稱為舅然未嘗干朝廷事後從秦王平薛仁果

功第一又從平東都賜女樂一部珍幣不貲武德四年

卒贈司徒

舊書作司空

諡曰密子衍靜誕衍襲爵官至左武

衛將軍

靜字元休隋左親衛武德初累擢并州大總管府長史

時突厥數為邊患糧道不屬靜請屯田太原以省餽運

議者以流亡未復不宜重困於是徵靜入與裴寂蕭瑀

封倫等議寂等不能屈乃從之歲收穀十萬斛詔檢校

并州大總管又請斷石嶺以為鄣塞制突厥之入復從

之太宗即位授司農卿封信都縣男少卿趙元楷事聚
歛靜會官屬責之曰如煬帝奢侈竭四海自奉司農須
公矣今天子躬節儉屈一人安兆庶惡用公哉元楷大
慙改夏州都督時方征突厥諸將多過靜所靜為陳虛
寔由是大克獲靜又聞其郁射設所部鬱孤尼等九俟
斤來歸帝嘉之賜以羊馬及突厥平將處其衆於河南
靜上疏以為損有用之民資無知之虜況彼首邱未忘
恐一旦變生犯我王略如臣計者莫如因其破亡之後

假以賢王之號妻之宗女分其土地析其部落使權弱
勢分易為羈制自可永保邊塞俾為藩臣矣帝雖不從
然嘉其忠優詔答之再遷民部尚書貞觀九年卒諡曰
肅子達尚遂安公主襲爵

誕隋末起家朝請郎義寧初辟丞相府祭酒轉殿中監
封安豐郡公尚高祖女襄陽公主從秦王征薛舉為元
帥府司馬累遷太常卿高祖幼子未出宮者十餘王國
司家事皆誕主之出為梁州都督貞觀初召拜右領軍

大將軍進莘國公為宗正卿太宗與語昏忘不能對乃
詔以光祿大夫就第卒贈工部尚書荊州刺史諡曰安
子孝慈嗣官至左衛將軍孝慈子希玠少襲爵中宗時
為禮部尚書以恩澤賜寔封開元中為太子少傅誕少
子孝謹

孝謹則天時歷太常少卿潤州刺史女即玄宗母昭成
皇后也后為則天所殺母龐氏亦被誣陷孝謹左遷羅州
司馬卒睿宗即位追贈太尉邠國公玄宗加贈太保孫

鏐尚永昌公主

按新書公主傳玄宗女昌樂公主下嫁
竇鏐二號不同蓋徙封
新書無孝誌

傳據舊書外
戚傳補入

璉字之推抗弟大業末為扶風太守以郡歸高祖歷民
部尚書從秦王平薛仁果賜錦袍尋鎮益州討平羣盜
皇甫無逸在蜀璉與不協因請入朝至半道詔還之璉
憂恐會使者至璉與宴卧內餉以綾綺無逸奏其事坐
免官未幾授秘書監封鄧國公貞觀初遷將作大匠奉
詔修洛陽宮璉於宮中鑿池起山務極侈麗浮費不貲

帝怒遽令毀之免璉官會納其女為鄴王妃復位卒贈
禮部尚書諡曰安璉頗曉音律武德中嘗與祖孝孫受
詔定雅樂璉討論故寔撰正聲調一卷行於代

威從孫德明

按宰相世系表德明德玄皆毅孫

父彥隋西平太守德明

師事陳留王孝逸通知文史漢王諒反遣將攻黎州德
明時年十八募兵擊破之擢齊王府屬坐事免高祖兵
叩長安留守官欲殺宗室孝基神符道宗及竇誕趙慈景
等德明諫止之後謁高祖終不自言時稱長者拜考功

即中從秦王世民擊王世充封顯武男歷常愛二州刺史卒弟德玄

德玄始為高祖丞相府千牛歷太宗時不甚顯高宗以其舊臣自殿中少監進御史大夫遷司元大常伯麟德初進檢校左相居位勤職約己未嘗有過又嘗分封爵與其弟德遠然迎時取合無所補益卒贈幽州都督諡曰恭子懷貞自有傳

李綱字文紀觀州蔭人少慷慨尚風節始名瑗慕張綱

為人改焉仕周為齊王憲參軍事宣帝將殺憲召僚屬
誣左其罪綱矢死無撓辭及憲誅露車載尸故吏犇匿
綱撫棺號慟為瘞訖乃去仕隋為太子洗馬太子勇宴
宮臣左庶子唐令則奏琵琶歌武媚娘曲綱曰令則官
調護乃自比倡優進淫聲惑視聽誠使上聞之豈不為
殿下累乎臣請正其罪勇曰置之我欲為樂耳後勇廢
文帝切讓官屬無敢對綱獨曰陛下不素教故太子至
此太子資中人得賢者輔而善得不肖導而惡奈何歌

舞鷹犬纖兒使日侍側何特太子罪耶帝曰朕過矣擢
尚書右丞時楊素蘇威用事綱据正不詭迎隨素等多
憾會大將軍劉方討林邑素言非綱不可任遂署行軍
司馬方揣素指數危辱之幾死軍還不得調稍除齊王
府司馬復詔出南海應接林邑久不召乃身入奏威劾
綱擅去所部以屬吏會赦免屏居鄆大業末賊帥何潘
仁劫為長史高祖入長安綱上謁授丞相府司錄參軍
封新昌縣公領選舉即位拜禮部尚書兼太子詹事齊

王元吉為并州總管縱左右攘奪宇文歆諫不聽騰狀顯言王坐免俄而復留劉武周入太原元吉懼棄軍奔京師并州陷帝怒謂綱曰王年少不習事故以歆及竇誕佐之太原興王地兵十萬粟支十年奈何一旦棄去歆建此計我當斬於軍綱曰王過惡誕養成之歆事王淺有闕必諍今賴歆計使陛下不失愛子且有功又可加罪乎翼日帝悟引綱陞御榻勞曰卿不言我幾濫罰於是釋歆帝以舞工安叱奴為散騎常侍綱諫曰周家

均工樂胥不得預士伍魏武使禰衡擊鼓衡先解朝衣
曰不敢以先王法服為伶人衣齊高緯封曹妙達為王
以安馬駒開府可為殷鑒今新造天下開太平之基功
臣賞未及徧高才猶伏草茅而先令舞胡鳴玉曳組位
五品趨丹地殆非創業垂統貽子孫之道也帝不納網
在東宮太子尤加禮嘗游溫湯網疾不從有進魚者太
子使膳之唐儉趙元楷自言其能太子曰操刀和味公
等善之若弼諸審諭固屬網矣遣使賜絹二百匹後太

子霽狎亡賴猜間朝廷綱頻諫不見聽遂乞骸骨帝罵曰卿為潘仁長史而羞朕尚書耶綱頓首曰潘仁賊也志殘殺然每諫輒止為其長史故無愧陛下功成厚自伐臣言如持水內石敢久為尚書乎且臣事東宮東宮又與臣忤是以上印綬帝謝曰知公直士幸卒輔吾兒乃拜太子少保尚書詹事如故綱上書太子曰綱老矣幸未就木願効愚直日殿下飲酒過量非養生之道凡為人子務孝謹以慰上心不宜聽受邪說與朝廷生基

間太子覽書不懌所為益縱綱悒悒不自賴固請老優
詔解尚書帝以綱隋名臣手敕未嘗名貞觀四年復為
少師以足疾賜步輿聽乘至閣問以政事詣東宮太子
承乾為拜每聽政必詔綱與房玄齡王珪侍坐嘗言曰
託六尺之孤寄百里之命古以為難綱以為易故發言
陳事辭色慷慨毅然不可奪及疾帝遣玄齡至家存問
明年卒年八十五贈開府儀同三司諡曰貞太子為立
碑初齊王憲女嫠居綱厚卹之及卒女被髮號哭如喪

其親綱在隋宦不進筮之得鼎筮人曰君當為卿輔然
待易姓乃如志仕不知退折足為敗故綱雖顯於唐數
稱疾辭位云孫安仁安靜安仁永徽中為太子左庶子
太子忠廢還邸寮屬奔散獨安仁泣拜而去終恒州刺
史安靜見忠義傳

鄭善果鄭州滎澤人父誠周大將軍開封縣公討尉遲
迥戰死善果方九歲以死事子襲爵隋開皇初進封武
德郡公年十四為沂州刺史累轉魯郡太守母崔賢明

曉政治當坐閣內聽善果處決當理則悅有不可則引

至牀下責媿之

善果母見隋書列女傳

故善果所至有績號清吏

與武威太守樊子蓋考為天下第一煬帝賜物千段黃

金百兩再遷大理卿突厥圍帝鴈門以守禦功拜右光

祿大夫從幸江都字文化及弒逆署民部尚書從至新

城

新舊書並作遼城誤

淮安王神通攻之善果督戰中流矢神通

解俄為竇建德將王琮所獲讓之曰公隋室大臣自尊

夫人亡名稱日衰且以忠臣子為逆賊徇命傷夷至此

謂何善果慙欲自殺或止之得不死建德不之禮乃歸
神通送京師擢太子左庶子更封滎陽郡公數為太子
陳得失未幾檢校大理卿兼民部尚書奉法持正風績
顯公卿間詔與裴寂等十人每奏事若侍得升殿而從
父兄元璠亦與時以為榮坐事免會山東平持節為招
撫大使以選舉失實除名後歷刑部尚書貞觀中以江
州刺史卒

元璠字德芳隋沛國公諱之子以父功拜儀同襲爵累

遷右衛將軍更封莘國公大業末出為文城郡守高祖
兵興遣將張綸西畧地攻拔其城係致軍門釋之授太
常卿與襄武王琛使突厥還為參旗將軍元璿習軍旅
事帝令教諸屯軍法宋金剛與突厥處羅可汗犄角寇
汾晉詔元璿諭罷可汗兵不聽會可汗暴疾其下意元
璿寘毒囚之處羅死頡利立留帳中數年帝既許可汗
婚元璿始得還帝勞曰卿不辱於虜可輩蘇武張騫矣
拜鴻臚卿母喪免會突厥攻太原詔起元璿持節往勞

頡利以失信咎中國元璿隨語折讓無所屈徐乃數其
背約突厥愧服因好謂頡利曰突厥得唐地無所用唐
得突厥不可使且掠財資劫人口皆入所部可汗一不
得豈若仆旗接好則金玉重幣一歸可汗顧不肯坐受
其利蔑德貽怨自取勞苦若何頡利善其言引還太宗
賜書曰知公口伐可汗遂使邊烽息警雖魏絳之功何
以加貞觀元年新舊書並作貞觀三年按通鑑在元年
至四年頡利被擒即下所云將亡之兆
不出三年也復使突厥還言夷狄興衰以馬羊為候今
今從通鑑

突厥民饑畜瘦將亡之兆也不出三年已而突厥果敗
後轉左武侯大將軍坐事免起為宜州刺史復封沛國
公以老致仕卒贈幽州刺史諡曰簡元璿幹敏所至常
有譽五聘絕域危不脫終不自為解然譯事後母不謹
隋文帝嘗賜孝經愧勗之至元璿亦不以孝聞士醜其
行從孫杲知名武后世終天官侍郎

裴矩字弘大絳州聞善人初仕北齊後入隋官至右光
祿大夫又事宇文化及竇建德建德敗乃降唐擢殿中

侍御史封安邑縣公累遷太子詹事預撰吉凶書儀八年檢校侍中隱太子敗餘黨保宮城不解秦王遣矩諭之乃聽命遷民部尚書太宗即位疾貪吏欲痛懲乂之乃間遣人遺諸曹一史受饋嫌帝怒詔殺之矩曰吏受賕死固宜然陛下以計給之因即行法所謂罔人以罪非道德齊禮之意帝悅為羣臣言之曰矩遂能廷爭不面從凡事若此天下有不治哉年八十精明不衰多識故事見重于時貞觀元年卒贈絳州刺史諡曰敬子宣機

高宗時官太子左中護

按裴矩隋書有傳其仕實建德以前事已採入鄭氏通志今不

複載惟取降唐後事著於篇

皇甫無逸字仁儉京兆萬年人

隋書皇甫誕傳安定烏氏人子志寧撰誕碑云

安定朝那人今據新書本傳

父誕隋并州司馬漢王諒反不從見殺

無逸在長安聞變即號慟曰吾父平生重節義必無苟

免者頃計至果然時五等廢煬帝嘉誕忠特封無逸平

興侯歷涑陽太守治為天下最再遷右武衛將軍居守

洛陽煬帝被弒乃與段達元文都立越王侗及王世充

纂棄母妻斬關自歸追騎及無逸解金帶投之地曰以
與爾無相困騎爭下取由是獲免高祖以隋勲舊尊遇
之拜刑部尚書封滑國公歷陝東道行臺民部尚書遷
御史大夫益州新定詔無逸持節巡撫得承制除吏既
至黜貪暴用廉善法令嚴明蜀人以安皇甫希仁愾人
也誣告無逸為母故陰交世充帝審其詐斬希仁又有
告無逸交通蕭銑者時無逸與行臺僕射竇瑒不協因
表自陳并上瑒罪有詔劉世龍溫彥博按之無狀遂斬

告者而黜璉及還帝勞曰比多譖毀但以正直為佞人
憎爾拜民部尚書出為同州刺史徙益州長史所至閉
閤不通賓客左右無敢出入者所須皆市易他境常按
部宿民家鐙炷盡主人將續進無逸抽佩刀斷帶為炷
其廉介類如此然過自畏慎每上表疏讀數下猶懼未
審使者上道追省再三乃得遣母在長安疾篤太宗命
馳驛召還承問憂悸不能食道病卒贈禮部尚書諡曰
孝王珪駁曰無逸入蜀不能與母俱留卒京師子道未

足稱不可謂孝乃更諡良

崔善為貝州武城人善術數仕隋調文林郎督工徒五百營仁壽宮總監揚素索簿閱實善為執板暗唱無一差謬素大驚自是四方有疑獄悉令按訊皆究其情仁壽中遷樓煩司戶書佐高祖為太守尤禮接善為見隋政日紊密勸高祖圖天下及兵起署大將軍府司戶參軍封清河縣公擢累尚書左丞用清察稱諸曹史惡之以其短而偃乃為謗書曰崔子曲如鉤隨時待封侯

唐書

載此詞小異今
從大唐新語

帝聞勉之曰昔齊末姦吏歌斛律明月

而高緯闇不察至滅其家朕雖不德幸免是因下令購
謗者謗乃止傅仁均撰戊寅歷李淳風詆其疏帝令善
為考二家得失多所裁正貞觀初為陝州刺史時議戶
狽地狹者徙寬鄉善為奏畿內戶衆而丁壯悉籍府兵
若聽徙皆在關東虛近實遠非經通計詔可歷大理司
農二卿坐與少卿不平出為秦州刺史卒贈刑部尚書
諡曰忠初天下既定羣臣居喪者皆奪服善為建言其

敝武德二年始許終喪然猶時以權迫不能免如房玄

齡褚遂良者衆矣

按崔善為李嗣真二人舊史俱入方技傳新史別為傳列於李襲志姜謩

之次今攷善為仕高祖朝屢有建白不徒以技術名家當與開國諸臣並列嗣真仕於高宗武后之世以妙解樂律稱列之武德勲臣之間似非其倫宜從舊史仍入藝術

高士廉名儉

宰相世系表作宗儉

士廉其字也渤海蓆人北齊清

河王岳之孫隋洮州刺史勣之子

勣新舊書並作勵今從隋書本傳作勣

少有器局觀書一過輒誦薛道衡崔祖濬與為忘年交

由是知名大業中為治禮郎坐與斛斯政善貶朱爲主

簿以母老不可居瘴癘地留妻鮮于氏奉養而行會世
大亂京師阻絕交趾太守丘和署為司法書佐會俚帥
甯長真來侵和懼欲出迎士廉策其不能持久乃署行
軍司馬逆擊破之武德五年與和上表歸國初士廉妹
適長孫晟生子無忌及一女晟卒士廉迎妹及甥於家
撫之甚有恩旋以其女妻太宗即文德皇后也時太宗
方為秦王領雍州牧因薦為治中親重之隱太子與王
隙已成士廉與無忌並預密謀至期率吏卒釋繫囚授

甲趨芳林門助戰王為太子授右庶子貞觀元年進侍
中封義興郡公坐匿王珪奏不時上出為安州都督進
益州大都督府長史蜀人畏鬼父母疾或不親扶持望
舍投餌哺之又兄弟不相假財士廉隨方訓誘風俗頓
改秦時李冰守蜀導汶江水灌田瀕水者頃值千金士
廉附故渠廝引旁出以廣溉道民用富饒與諸生講授
經藝以興學校又禮致隱士朱挑推蜀人以為美談五
年入為吏部尚書進許國公雅負鑒裁又詳氏譜所署

用人地無不當者加特進尋同中書門下三品十二年
改封申國公拜尚書右僕射帝幸洛陽太子監國命攝
少師久之請致仕聽解僕射仍以開府儀同三司平章
事十九年太宗伐高麗太子監國定州又攝太傅同掌
機務還至并州有疾帝即所舍問之二十一年疾甚帝
幸其第為流涕卒年七十一

舊書作
七十二

贈司徒并州都督

諡曰文獻高宗即位加贈太尉配享太宗廟庭士廉進
止詳華每有獻納縉紳屬目奏上輒焚其橐家人無見

者初太宗以山東士人尚閥閱雖累葉陵遲子孫猶負
世望嫁娶必多索聘財人謂之賣昏由是詔士廉與韋
挺岑文本令狐德棻責天下譜牒參考史傳正其真偽
第其甲乙分為九等捨名取實專以今朝品秩為高下
皇族為首外戚次之凡二百九十三姓六百五十一家
號曰氏族志頒行天下

謹按通鑑輯覽

御批當塗以九品衡人致士大夫矜其地望遂有上品無寒
門下品無勢族之譏自晉及隋相沿不變太宗頒姓譜使
天下知哀世舊門不敢與興朝勲閥相抗而元漢為氏族
升冕亦猶周家之薛不先滕劉友益不以為然失之吹求矣

又嘗受詔與魏徵等集文學之士撰文思博要一千二百卷上之士廉六子履行真行知名

履行

宰相世系表名文敏蓋亦以字行

居喪以孝聞尚太宗女東陽公

主襲申國公永徽初拜戶部尚書後出為益州大都督府長史士廉先居此職履行繼之亦有政聲及長孫無忌得罪貶洪州都督改永州刺史真行官至左衛將軍其子典膳丞岐連章懷太子事詔付真行自懲誠真行手刃之棄其屍帝鄙之貶睦州刺史士廉五世孫重見

文苑傳



欽定續通志卷二百四